

**Headlines**

- 1 प्रधानमंत्री नरेंद्र मोदी होंरें कांग्रेस उप्पर नशाना साधदे होई उनेंगी संविधान दा सब्बनें शा बड्डा विरोधी करार दित्ता, उनें आखेआ जे जम्मू-कश्मीर च आतंकवाद अपने खीरी साह लै करदा ऐ।
- 2 सेना प्रमुख जनरल उपेंद्र द्विवेदी होंरें जम्मू-कश्मीर दे पुंछ जिले दी नियंत्रण रेखा उप्पर सतर्कता अभियान दा जायजा लैता।
- 3 आई.जी बीएसएफ कश्मीर फ्रंटियर अशोक यादव होंरें अमरनाथ यात्रा लेई सेना दी तैयारियें दा जायजा लैता।
- 4 केंद्री मंत्री अश्विनी वैष्णव होंरें ग्लोबल इंडिया ए.आई शिखर सम्मेलन दा उद्घाटन कीता ते गलाया जे ए.आई दी क्षमता दा इस्तेमाल करने दे भारत दे नजरिये दा उद्देश्य प्रौद्योगिकी दा लोकतंत्रीकरण करना ऐ।

<><><><><><>

**PM-RS**

प्रधानमंत्री नरेंद्र मोदी होंरें अज्ज कांग्रेस पर नशाना साधदे होई उनेंगी संविधान दा सब्बनें शा बड्डा विरोधी करार दित्ता। राज्यसभा च संसद दी सांझी बैठक च राष्ट्रपति द्रौपदी मुर्मू हुंदे अभिभाषण पर धन्नवाद प्रस्ताव दा परता दिंदे होई मोदी होंरें दोष लाया जे कांग्रेस दी सोच अनुसूचित जातिएं, अनुसूचित जनजातिएं ते होंरनें पिछड़े वर्गें दा विरोध करने दी ऐ। उनें मुख विरोधी धड़ें पर साबका राष्ट्रपति रामनाथ कोविंद हुंदा अपमान करने दा बी आरोप लाया ते आखेआ जे उन्नै राष्ट्रपति द्रौपदी मुर्मू हुंदा अपमान करने च बी कोई कसर नेई छोड़ी। प्रधानमंत्री होंरें आखेआ जे संविधान शडा अनुच्छेद दा संकलन नेई ऐ, सगुआं एहदी भावना ते शबद सरकार लेई बडे कीमती ना। मोदी होंरें आखेआ जे संसद दे दौनें सदनें दी सांझी बैठक च राष्ट्रपति द्रौपदी मुर्मू हुंदे अभिभाषण दे धन्नवाद प्रस्ताव पर राज्यसभा च जवाब दिंदे होई आखेआ जे संविधान सरकार गी बत्त दस्सने आला इक प्रकाश स्तम्भ ऐ जेदी लो च कोई बी सरकार संविधान दे नियमें कायदें मुजब देश चलाई सकदी ऐ। प्रधानमंत्री होंरें बाबा साहेब डॉ. भीमराव अम्बेडकर हुंदे योगदान दी सराहना करदे होई आखेआ जे संविधान 75में बरे च परवेश करा करदा ऐ। उनें संविधान दिवस मनाने दा विरोध करने आलें पर नशाना साधदे होई आखेआ जे अज्ज एह आम लोकें दा ध्यार बनी गेदा ऐ कीजे लोकें एहदा मतलब ते महत्व समझी लैते दा ऐ। एनडीए सरकार दे त्रीए कार्यकाल दौरान सरकार दे नजरिए पर प्रधानमंत्री होंरें आखेआ जे गरीबी दे खलाफ लड़ाई सरकार दा प्रमुख एजेंडा होगा। उनें आखेआ जे देश च गरीबी दे खलाफ लड़ाई सरकार दा पैहला मकसद ऐ ते मेद प्रगट कीती जे सरकार एहदे च पक्क गै कामयाब होगा। उनें आखेआ जे कल्याणकारी योजनाएं दी रफ्तार, गहराई ते विस्तार रकार दी सब्बनें शा अब्बल तरजीह ऐ। उनें आखेआ जे सरकार अपने त्रीए कार्यकाल च देश गी दुनिया दी त्री सब्बनें शा बड्डी अर्थ बवस्था बनाने लेई बचनबद्ध ऐ ते उन्नै एहदा पक्का धेइयो कीते दा ऐ। उनें आखेआ जे जम्मू-कश्मीर च आतंकवाद अज्ज अपने खीरी साह लै करदा ऐ ते बक्ख-बक्ख आहली सोच बी। उनें आखेआ जे पी.एम किसान सम्मान निधि योजना तैहत 10 करोड़ करसानें गी लाहू पुज्जा ऐ ते पिछले 6 बरे दौरान त्रै लक्ख करोड़ रपे कोला मती रकम करसानें च बंडी दित्ती गेदी ऐ। उनें आखेआ जे कोविड महामारी दी चुनौती दे बावजूद बी मुख दुनिया दी 5मीं बड्डी अर्थ बवस्था बनी सकेया। एह अपने आपै च इक बड्डी कामयाबी ऐ। उनें आखेआ जे लोकें सरकार आस्सेआ पिछले 10एं बरें दौरान कीते गेदे कम्में दा पूरा समर्थन कीता ते उनें गल्लें दे बजाय कारकरदगी गी चुनेया। उनें आखेआ जे 6एं दहाकें दे बाद पैहली बारी लोकें कुसै सरकार गी उप्परतली त्री बारी देश दी सेवा करने दा मौका दित्ता ऐ। भ्रष्टाचार बारे गल्ल करदे होई मोदी होंरें आखेआ जे केंद्री एजेंसिएं गी भ्रष्टाचारिएं खलाफ कार्रवाई करने दी खुल्ली छूट दित्ती गेदी ऐ। प्रधानमंत्री होंरें जिसले एह भाषण देआ रदे हे, विरोधी पार्टियां जिंदे च कांग्रेस, डीएमके, टीएमसी, आम आदमी पार्टी, आरजेडी, खब्बे धड़े दियां पार्टियां ते होंरें किश दल शामिल न, उनें रौला पाई रक्खेआ। राज्यसभा अध्यक्ष जगदीप धनखड़ होंरें उनेंगी बार-बार अपनी सीटें पर बौहने लेई आखेआ पर ओह आक्खे नेई लगगे ते वाँकआउट करी दित्ता। एहदे पर प्रधानमंत्री होंरें आखेआ जे विपक्ष कश उंदे आस्सेआ पुट्टे गेदे सोआले दा परता सुनने दी बी हिम्मत नेई ऐ इस करिए ओह वाँकआउट करी गेन। सदन च उत्तर प्रदेश दे हाथरस च कल पेश आए दे दर्दनाक हादसे च होई दी जानी नुकसान पर बसोस प्रगट कीता गेआ। राज्यसभा अध्यक्ष होंरें

आखेआ जे घायलें दे इलाज लेई लोडचदी हर मुमकन सहायता उपलब्ध कराई जा'रदी ऐ ते मामले दी जांच लेई इक कमेटी दा गठन बी कीता गेदा ऐ।

<><><><><><>

### RS-Sine Die

राज्यसभा दी कार्रवाई अज्ज अनिश्चित समें लेई स्थगित करी दित्ती गई ऐ। दवैं सदनें दी संयुक्त बैठक च राष्ट्रपति द्रौपदी मुर्म हूंदे अभिभाषण उप्पर धन्नवाद प्रस्ताव मगरा सभापति जगदीप धनखड़ होरें एहदी घोषणा कीती।

<><><><><><>

### Army Chief Visit

सेना प्रमुख दा कार्यभार साम्भने मगरा जनरल उपेंद्र द्विवेदी होरें अज्ज पुंछ जिले दा अपना पैहला आधिकारिक दौरा लाया ते सर्तकता बरतने ते नियंत्रण रेखा उप्पर मती चौकसी बरतने लेई आधुनिक तकनीकें दे इस्तेमाल उप्पर जोर भरेया। अपने दौरे दौरान जनरल द्विवेदी होरें मुख्क अफसरें कन्नै उच्च सतरीय मीटिंग बी लाई। उंदे कन्नै उत्तरी कमान दे जी.ओ.सी-एम.बी सुचिंद्रा कुमार, 16 कोर दे जी.ओ.सी नवीन सचेंद्रा ते 25 डिविजन दे जीओसी गौरव रिषी होर बी मौजूद हे। इस मौके जनरल द्विवेदी होरें अधिकारियें गी नियंत्रण रेखा उप्पर होर मती चौकसी बरतने दे निर्देश दित्ते। उनें आखेआ जे साहडे मुख्क दी अखंडता लेई साहडा सतर्क रौहना बडा मता जरूरी ऐ। एहदे लेई असेंगी आधुनिक तकनीकें दा इस्तेमाल करना लोडचदा ऐ तां जे अस अपने बन्ने कन्ने लगदे इलाकें दी होर बेहतर तरीके कन्नै हिफाजत करी सकचै।

<><><><><><>

### IG-BSF Yatra

बीएसएफ दे कश्मीर फ्रंटियर दे महानिरीक्षक अशोक यादव होरें अज्ज बल दिएं कारवाइएं सरबंधी तैयारिएं दा जायजा लैता जेडी अमरनाथ जी दी जात्रा लेई दक्खनी कश्मीर दे पैहलगाम आले इलाके च तैनात कीती गेदी ऐ। 52 दिनें दी एह यात्रा ऐकती शनिवारें यात्रा दे दौनें रस्तेयां शुरू होई ही। आधिकारिक जानकारी मुजब यात्रा दे पैहले 4 दिनें च 74 ज्हार कोला मते श्रद्धालु पवित्र गुफा च कुदरती बर्फु कन्नै बने दे शिवलिंग दे दर्शन करी चुके दे ना। यात्रा दी सुरक्षा लेई सारे इलाके च निग्गर बंदोबस्त कीते गेदे ना। पुलस ते केंद्री थेआरबंद बलें दे अलावा फौज गी बी बाहरले घेरे ते उच्चे प्हाड़ें पर तैनात कीता गेदा ऐ। बीएसएफ दे इक प्रवक्ता नै जानकारी दित्ती ऐ जे आई.जी होरें सुरक्षा बंदोबस्तें दे सब्बनें पैहलुएं दी तफसीली समीक्षा कीती जिंदे च रस्ता खोलने आहलिएं रोड ओपनिंग पार्टिएं दी सर्तकता दा जायजा बी शामिल ऐ जेडे निर्विघ्न यात्रा लेई 24 घंटे डटे दे रौहंदे ना। उनें उत्थे तैनात बलें कन्नै गल्लबात बी कीती।

<><><><><><>

### CAC-SANJY

श्री अमरनाथ जात्रा लेई कीती जा'रदी साफ-सफाई अभियान दे अज्ज दुए ध्याडे लाल चौक श्रीनगर दे घंटाघर च लोकें च बडा मता उत्साह दिक्खने गी लब्बा। यात्रुएं दा स्वागत भव्य सांस्कृतिक कार्यक्रमें कन्नै होआ। इस मौके घर ते शैहरी विकास विभाग दियां कमिशनर सेक्रेटरी मनदीप कौर होर मुख्क परौहनियां हियां। होरनें दे अलावा कश्मीर स्मार्ट सिटीज़ दे सलाहकार केशवर वर्मा श्रीनगर म्युनिसिपल कारपोरेशन दे वरिष्ठ अधिकारी, झील संरक्षण ते प्रबंधन प्राधिकरण ते होर दुए वरिष्ठ अधिकारी मौजूद हे। इस समारोह च स्वच्छ तीर्थ यात्रा दे अनुभव गी बढावा देने लेई परम्परा ते आधुनिकता दा बडे शैल सनाहकडे ढंगै कन्नै इस्तेमाल कीता गेदा हा। इस मौके उप्पर बोलदे होई मनदीप कौर होरें स्वच्छता अभियान दी महत्ता उप्पर लो पाई जेदा उद्देश्य यात्रुएं गी प्लास्टिक दा इस्तेमाल नेई करने ते साफ-सफाई बनाई रखने लेई प्रोत्साहित करना ऐ।

<><><><><><>

### JKTPO-Poonch

जम्मू-कश्मीर च व्यापार गी बढावा देने सरबंधी संगठन जे.के.टी.पी.ओ नै जिला प्रशासन पुंछ दी सांझ-भ्याली कन्नै अज्ज पुंछ च ई-कामर्स दे मौजूदा अभियान दी श्रृंखला दा सरिस्ता कीता। अतिरिक्त जिला विकास कमिशनर संदेश शर्मा होरें इस सरबंधत च इक कार्यशाला दा उद्घाटन कीता। एहदे बारै गल्ल करदे होई ए.डी.डी.सी होरें आखेआ।

<><><><><><>

## Global-India

इलेक्ट्रानिक्स ते सूचना प्रौद्योगिकी मंत्री अश्विनी वैष्णव होरें आखेआ ऐ जे मसनूई सूझ-बूझ यानि आर्टिफिशल इंटेलीजेंस दी छमता दा इस्तेमाल जेन्स दी छमता दा इस्तेमाल करने दे भारत दे नजरिए दा उद्देश्य, प्रौद्योगिकी दा लोकतंत्रीकरण करना ऐ। नमीं दिल्ली च अज्ज ग्लोबल इंडिया ए.आई शिखर सम्मेलन दा उद्घाटन करदे होई मंत्री होरें इस गल्लै पर जोर दिता जे प्रौद्योगिकी हर कुसै लेई असान ते फैयदा सुविधा पुजाने आली होनी लोडचदी। उनें दस्सेया जे सरकार तौलें गै ए.आई मिशन शुरू करोग जेदी लागत 10 ज्हार करोड रपे ऐ। उनें आखेआ जे सार्वजनिक निजी भ्याली यानि पी.पी.पी राएं 10 ज्हार या एहदे शा मते ग्राफिक प्रोसेसिंग युनिट जी.पी.यू दे ए.आई कम्प्यूट बुनियादी ढांचे च पैहा लांगन। अश्विनी वैष्णव होरें आखेआ जे इक ए.आई नावाचार केंद्र बी स्थापित कीता जाग जेडा उच्च गुणवत्ता आहले डेटासेट हासल करने पर ध्यान केंद्रित करोग।

<><><><><><>

## Jaishankar-Russia FM

विदेश मंत्री डॉ. एस जयशंकर होरें अज्ज कजाखिस्तान दे अस्ताना च रूस दे विदेशमंत्री सरगे लावरोव हुंदे कन्नै मौजूदा समें च युद्ध क्षेत्र च रवारदे भारतीय नागरिकें दी स्थिति उप्पर गंभीर चौता बुज्जी ऐ। डॉ. जयशंकर होरें उंदी सुरक्षित ते तौले वापसी लेई गलाया। दवै मंत्रियें शंघाई सहयोग संगठन शिखर सम्मेलन दे बक्ख बाहरें भारत रूस दपक्खी सांझेदारी ते मुद्दें उप्पर व्यापक चर्चा कीती।

<><><><><><>

## Aditya L-1

भारत दा पैहला सौर अभियान आदित्य एल-वन अंतरिक्षयान सूरज ते धरती दे बश्कार एल-वन बिंदू पर अपना पैहला चक्कर पूरा करी चुके दा ऐ। भारतीय अंतरराष्ट्रीय अंतरिक्ष संगठन इसरो नै जानकारी दिती ऐ जे कल एहदे स्टेशन कीपिंग मनोवर नै दुई प्रभामंडल कक्षा च बिजन कुसै दिक्कत अडचन दे कायम करना मुमकिन कीता। आदित्य एल-वन अभियान गी 2 सितंबर 2023 गी लांच कीता गेआ हा। एहू लैग्रेजियन बिंदू एल-वन उप्पर इक भारतीय सौर वेधाशाला यानि इक चाल्ली दी लबाटरी ऐ। इसी 6 जनवरी 2024 गी एहदे लक्षित प्रभामंडल कक्षा च दाखल कराया गेआ हा। इसरो नै दस्सेया कि आदित्य एल-वन अंतरिक्ष यान प्रभामंडल कक्षा च एल वन प्वाइंट दी परिक्रमा पूरी करने च 178 दिनें दा टैम लांदा ऐ।

<><><><><><>

## Farmers

जिला प्रशासन रियासी नै अज्ज पैंथल ब्लॉक दे बक्ख-बक्ख करसाने गी राई-बाई च कम्म आने आहिलयां मशीनां ते त्रै ट्रैक्टर प्रदान कीते। एहू मशीनां प्रधानमंत्री हुंदी आत्मनिर्भर भारत मुहिम तैहत दिते गे। स्थाळे संवाददाता कन्नै गल्ल करदे होई रियासी दे डिप्टी कमिशनर विशेष महाजन होरें आखेआ।

<><><><><><>